



Na osnovu člana 8 Zakona o Službenom glasniku Brčko distrikta Bosne i Hercegovine („Službeni glasnik Brčko distrikta BiH“, brojevi: 1/00 i 17/04) i Odluke o davanju ovlaštenja Zakonodavnoj komisiji Skupštine Brčko distrikta BiH, broj: 01-02-218/17 od 13. 9. 2017. godine („Službeni glasnik Brčko distrikta BiH“, broj 35/17), Zakonodavna komisija Skupštine Brčko distrikta BiH na 80. sjednici održanoj 24.4.2024. godine utvrdila je prečišćeni tekst Zakona o administrativnim taksama („Službeni glasnik Brčko distrikta BiH“, broj 21/05) s izmjenama i dopunama Zakona o administrativnim taksama („Službeni glasnik Brčko distrikta BiH“, brojevi: 19/07, 2/08, 17/09, 8/13 i 11/20).

Broj: 01.3-02-2705/24
Brčko, 24.4.2024. godine

PREDSJEDAVALAČI
ZAKONODAVNE KOMISIJE
Ljubiša Lukić

ZAKON
O ADMINISTRATIVNIM TAKSAMAMA
(PREČIŠĆENI TEKST)

I. OPĆE ODREDBE

Član 1

Ovim zakonom utvrđuju se administrativne takse koje se plaćaju za podneske, akte, isprave i radnje u upravnim i drugim stvarima (u daljem tekstu: spisi i radnje) kod organa uprave Brčko distrikta Bosne i Hercegovine (u daljem tekstu: Brčko distrikt) i drugih pravnih lica kojima je povjereno da samostalno rješavaju u upravnim stvarima o pravima i obavezama.

Član 2

- (1) Spisi i radnje za koje se plaća taksa, kao i visina takse utvrđuju se taksenom tarifom.
- (2) Taksa se može naplatiti samo ako je propisana taksenom tarifom.

1. Takseni obveznik

Član 3

- (1) Takseni obveznici su sva fizička i pravna lica po čijem se zahtjevu postupak pokreće, odnosno vrše radnje predviđene taksenom tarifom.
- (2) Ako za istu taksu postoje dva ili više taksenih obveznika, njihova obaveza je solidarna.

2. Taksena obaveza

Član 4

(1) Ako taksenom tarifom nije drugačije propisano, taksena obaveza nastaje:

- a) za podneske - u trenutku kada se predaje, a podneske date u zapisnik - kad se zapisnik sastavlja;
- b) za akte i druge isprave – u trenutku podnošenja zahtjeva za njihovo izdavanje;
- c) za pravne radnje – u trenutku podnošenja zahtjeva za izvršenje tih radnji.

(2) Taksa se plaća u trenutku nastanka taksene obaveze.

Član 5

U aktu ili drugoj ispravi za koju je taksa plaćena mora se označiti da je taksa plaćena, u kojem iznosu i po kojem tarifnom broju.

Član 6

Za podnesak za koji nije plaćena ili nije dovoljno plaćena taksa organ nadležan za odlučivanje po zahtjevu, pozvat će taksenog obveznika opomenom da u roku od 8 (osam) dana od dana prijema opomene plati redovnu taksu i taksu za opomenu.

Član 7

Ako u ostavljenom roku takseni obveznik ne plati ili nedovoljno uplati taksu za podnesak, organ uprave zatražit će od Direkcije za finansije Brčko distrikta BiH, Porezna uprava da naplati taksu prinudnim putem u skladu sa odredbama zakona o Poreznoj upravi Brčko distrikta BiH.

Član 8

Kad je taksu dužno da plati lice koje ima prebivalište u inostranstvu, a taksu nije platilo u trenutku nastanka obaveza, naplata takse izvršit će se prije uručenja akta kojim je postupak okončan.

3. Taksena osnovica

Član 9

Ako je taksenom tarifom propisano da se taksa plaća prema vrijednosti predmeta, kao osnovica za obračunavanje takse uzima se vrijednost označena u podnesku ili ispravi ili vrijednost utvrđena procjenom organa koji vodi postupak.

Član 10

(1) Kada se isprava, za koju se plaća taksa po zahtjevu stranke izdaje u dva ili više primjeraka, za drugi i svaki naredni primjerak plaća se taksa kao za prijepis ili ovjeru prijepisa.

(2) Taksa iz prethodnog stava ne može biti veća od takse za prvi primjerak.

II OSLOBAĐANJE OD PLAĆANJA TAKSI

Član 11

Spisi i radnje u postupcima koji se vode po službenoj dužnosti između organa i institucija Brčko distrikta BiH ne podliježu plaćanju administrativnih taksi.

Član 12

(1) Administrativna taksa ne plaća se na:

- a) izvode i uvjerenja koja se pribavljaju za potrebe izbora ili promjene entitetskog državljanstva stanovnika Brčko distrikta Bosne i Hercegovine (u daljnjem tekstu: Brčko distrikt BiH);
- b) izvode i uvjerenja u postupku izdavanja lične karte i određivanja jedinstvenog matičnog broja;
- c) ovjeru dokumenata u svrhu izbora ili promjene entitetskog državljanstva;
- d) spise i radnje u postupku za povrat i preknjižavanje nepravilno plaćenih dažbina;
- e) spise i radnje neophodni za školovanje učenika do 20 godina života;
- f) spise i radnje neophodni za školovanje studenata do 25 godina života, uz predočenje dokaza;
- g) spise i radnje u vezi s ostvarivanjem i zaštitom prava iz radnog odnosa;
- h) spise i radnje u postupku za sastavljanje i ispravku biračkih spiskova i spiskova za kandidovanje;
- i) spise i radnje u postupku za ispravljanje grešaka u aktima, ispravama i službenim evidencijama;
- j) spise i radnje u postupku usvajanja i postavljanja staratelja;
- k) spise i radnje za ostvarivanje prava iz penzijskog i zdravstvenog osiguranja;
- l) prijave i upise u matične knjige;
- m) prijave i odjave prebivališta i boravišta građana;
- n) spise i radnje u postupku za ostvarivanje prava na dodatak za djecu;
- o) spise i radnje u vezi sa zaštitom spomenika kulture;
- p) spise i radnje u postupku za sahranu umrlih;
- q) podneske upućene organima za predstavke i pritužbe;
- r) spise i radnje u vezi s prijemom poklon-paketa od dobrotvornih organizacija iz inostranstva, ako su upućeni dobrotvornim organizacijama u Brčko distriktu BiH;
- s) spise i radnje u vezi s priznavanjem prava na povlaštenu vožnju građanima, kojima to pravo pripada po važećim propisima;
- t) originale diplome, svjedočanstva i drugih isprava o završenom školovanju ili klasifikaciji, osim njihovih duplikata i prevoda;
- u) spise i radnje u postupku prenosa na Brčko distrikt BiH nekretnina po osnovu nacionalizacije, eksproprijacije, arondacije, komasacije i slično;
- v) spise i radnje u postupku ostvarivanja prava preče kupovine nekretnina u korist Brčko distrikta BiH;
- w) sve vrste prijave i priloga uz njih za razrez poreza na dohodak;
- x) spise i radnje u postupku za ostvarivanje prava boraca, ratnih vojnih invalida od prve do četvrte kategorije, porodica poginulih boraca, bivših logoraša i civilnih žrtava rata, uz predočenje dokaza;
- z) spise i radnje u postupku ostvarivanja prava na pomoć za izgradnju i obnovu ratom porušenih stambenih objekata.

(2) Od plaćanja takse oslobođeni su:

- a) građani za prijavu na konkurse za zasnivanje radnog odnosa, uz predočenje dokaza;
- b) građani koji se privremeno nalaze van radnog odnosa u postupku za ostvarivanje materijalnog osiguranja i drugih prava koja im po tom osnovu pripadaju;
- c) građani u stanju socijalne potrebe, uz predočenje dokaza nadležnog organa;
- d) humanitarne i dobrotvorne organizacije;
- e) organizacije za zaštitu lica s fizičkim i psihičkim nedostacima i poremećajima;
- f) građani koji poklanjaju svoju imovinu u korist Brčko distrikta BiH ili se odriču prava vlasništva, kao i za prenos vlasništva.

Član 13

U aktima i ispravama koje su oslobođene od plaćanja takse, mora se označiti radi čega se izdaju i na osnovu kojeg propisa su oslobođeni od takse.

Član 14

Pod uslovima reciprociteta, strani državljani imaju ista prava i obaveze po propisima o taksama kao i građani Brčko distrikta.

III. POVRAT TAKSE

Član 15

(1) Lice koje je platilo taksu koju po ovom zakonu nije bilo dužno da plati ili je taksu platilo u iznosu većem od propisanog ima pravo na povrat više plaćene takse.

(2) Postupak za povrat takse pokreće se po zahtjevu stranke.

(3) Rješenje o povratu takse donosi nadležni organ kome je taksa plaćena. Rješenje se radi u 2 (dva) primjerka od kojih se jedan primjerak upućuje stranci, a jedan Trezoru Direkcije za finansije Brčko distrikta BiH.

(4) Povrat takse vrši se na teret prihoda budžeta Brčko distrikta.

IV. ZASTARIJEVANJE

Član 16

Pravo na naplatu takse zastarijeva za dvije godine od isteka godine u kojoj je taksu trebalo platiti, a pravo na povrat više plaćene takse zastarijeva za dvije godine od dana kada je taksa plaćena.

V. NADZOR

Član 17

Nadzor nad primjenom ovog zakona vrši Direkcija za finansije Brčko distrikta BiH, Porezna uprava i Upravna inspekcija, svako iz svoje nadležnosti.

VI. PLAĆANJE TAKSI

Član 18

(1) Takse se mogu platiti:

- a) administrativnim taksenim markama jedinstvene emisije (u daljnjem tekstu: taksene marke);
- b) u gotovom novcu na jedinstveni račun Trezora Brčko distrikta BiH.

(2) Taksene marke se izdaju u apoenima od 1 KM, 2 KM, 5 KM, 10 KM i 50 KM.

Član 18a

(1) Taksene marke izrađene su na bijelom bezdrvnom papiru u linijskoj zaštiti.

(2) U srednjem dijelu taksene marke nalazi se grb Bosne i Hercegovine uokviren stilizovanom rozetom. Ispod grba nalazi se oznaka vrijednosti taksene marke, a lijevo i desno od oznake nalazi se skraćenica valute „KM“.

(3) U gornjem dijelu taksene marke odštampan je tekst latinicom i ćirilicom: „Brčko distrikt Bosne i Hercegovine, administrativna taksena marka“.

(4) Taksene marke štampaju se u plavoj boji.

Član 18b

(1) Za štampanje, puštanje u opticaj i distribuciju taksenih maraka nadležna je Direkcija za finansije Brčko distrikta BiH.

(2) Uplaćene takse su prihodi Brčko distrikta BiH.

Član 19

Za spise i radnje kod organa Brčko distrikta BiH i organizacija na koje su prenesena ovlaštenja, takse se plaćaju po sljedećoj tarifi administrativnih taksi Brčko distrikta BiH.

TARIFA ADMINISTRATIVNIH TAKSI

Takse na spise i radnje u upravnim i drugim stvarima kod organa uprave Brčko distrikta BiH iznose u KM, i to:

PODNESCI

Tarifni broj 1

Na podneske5 KM,
osim zahtjeva za izdavanje izvoda i uvjerenja iz matične evidencije, zahtjeva za izdavanje izvoda iz planskih akata i svih zahtjeva imovinskopravne prirode, zahtjeva za dodjelu jednokratne pomoći, zahtjeva fizičkih i pravnih lica koji se odnose na inspeksijski nadzor, zahtjeva za nadoknadu štete nastalu usljed elementarnih nepogoda.

Napomena:

1. Taksa po ovom tarifnom broju ne plaća se na naknadne podneske kojim stranka zahtijeva samo brži postupak po njima.

Tarifni broj 2

Na žalbe protiv rješenja5 KM,
osim rješenja donesenih u postupcima rješavanja imovinskopravnih odnosa.

AKTI

Tarifni broj 3

Za sva rješenja5 KM.

Napomena:

1. Ako se donosi rješenje po zahtjevu više lica, taksa po ovom tarifnom broju plaća se onoliko puta koliko ima lica kojima se rješenje dostavlja;

2. Za rješenja donesena po žalbi ne plaća se taksa.

Tarifni broj 4

Za izdavanje plovidbene dozvole40 KM.

Tarifni broj 5

(1) Za izdavanje odobrenja za obavljanje prevoza za vlastite potrebe u drumskom saobraćaju30 KM.

(2) Za svaku izmjenu odobrenja za obavljanje prevoza za vlastite potrebe u drumskom saobraćaju plaća se5 KM.

ISPRAVE

Tarifni broj 6

(1) Za izdavanje:

a) izvoda iz matičnih knjiga - domaći2 KM,

b) izvoda iz matičnih knjiga - inostrani5 KM,

c) uvjerenja5 KM.

(2) Za obavljanje zaključenja braka:

a) u službenim prostorijama30 KM,

b) van službenih prostorija po zahtjevu stranke.....150 KM,

(3) Za pokretanje smrtovnice po zahtjevu stranke5 KM.

Napomena:

Ukoliko stranka putem jednog ili više zahtjeva traži više isprava taksa će biti onoliko puta naplaćena koliko se isprava traži.

Tarifni broj 7

(1) Za duplikat isprave o završenom školovanju ili stručnoj kvalifikaciji, kao i izdavanje fotokopija dokumenata iz arhive i Arhiva Brčko distrikta BiH5 KM.

(2) Za korištenje arhivskih fonova s ciljem istraživanja arhivske građe:

a) za korištenje jednog fona50 KM,

b) za korištenje svakog fona.....10 KM.

Napomena

Ukoliko stranka putem jednog ili više zahtjeva traži fotokopije dokumenta iz više predmeta, taksa će biti onoliko puta naplaćena, koliko predmeta zahtjev obuhvata.

Tarifni broj 8

Za uvjerenje kojim se dokazuje porijeklo, vrijednost, količina, kvalitet ili zdravstvena ispravnost robe.....5 KM.

Napomena: Ova taksa ne plaća se na inostrane poštanske deklaracije koje prate sprovedni list.

RADNJE

Tarifni broj 9

(1) Za ovjeru potpisa, rukopisa i prepisa fizičkih lica:

- a) za ovjeru svakog potpisa2 KM,
- b) za ovjeru autentičnosti rukopisa, za ovjeru prepisa ili fotokopija od svakog polutabaka ..1 KM ,
- c) za ovjere potvrde o životu5 KM,
- d) za ovjeru raznih vrsta spisa koji se koriste za rješavanje statusnih pitanja građana 5KM,
- e) za ovjeru izjava, potvrda odnosno uvjerenja o izdržavanju koje se koristi u inostranstvu.....30 KM.

(2) Za ovjeru svakog potpisa, rukopisa i prepisa pravnih lica5 KM.

Napomena:

Pod polutabakom podrazumijeva se list papira od dvije strane normalnog uredskog papira ili papira manjeg formata (22 x 25 cm).

Tarifni broj 10

Za ovjeru plana5 KM.

Tarifni broj 11

Za ovjeru kaliografske kopije plana (crteža) plaća se od cijelog započetog kvadratnog metra5 KM.

Tarifni broj 12

(1) Za ovjeru potpisa na ugovorima na ime takse plaća se 0,5% od vrijednosti:

- najmanje2 KM,
- najviše30 KM.

(2) Za ovjeru potpisa na ugovorima koji su neophodni za dobijanje kredita plaća se taksa od2 KM.

Napomena:

1. Svaka izmjena sadržaja ugovora smatra se u pogledu takse kao nov ugovor.
2. Taksa po stavu 1 ovog tarifnog broja plaća se na vrijednost koja je u ugovoru navedena.
3. Ako nije navedena vrijednost ugovora i/ili vremenski period naplaćuje se najviši iznos takse iz stava 1.

Tarifni broj 13

Za prepisivanje službenih akata ili dokumenata:

- a) kad prepisivanje vrše zainteresovana lica, od polutabaka originala10 KM,
- b) kad prepisivanje vrši organ, organizacija ili zajednica od polutabaka originala10 KM,

c) kad organ, organizacija ili zajednica vrši prepisivanje akata ili dokumenata na stranom jeziku, od polutabaka originala30 KM.

Napomena:

Taksa iz tarifnog broja 13 važi za prvi polutabak, a za svaki sljedeći polutabak plaća se po.....
.....5 KM.

Tarifni broj 14

Za izdavanje odobrenja za građenje:

a) Za nužno prateće objekte (drvljanik, šupe, bunare, poljske nužnike i slično)... 5,00 KM,

b) Za druge prateće objekte (garaže, priručna skladišta, otvorene nadstrešnice,

ljetne kuhinje i slično) 10,00 KM,

c) Za individualne stambene objekte s jednom stambenom jedinicom od predračunske vrijednosti 1% ili

- minimalno 30,00 KM

- maksimalno 300, 00 KM,

d) za individualno stambene objekte s dvije ili tri stambene jedinice, stambeno-poslovne objekte s jednom poslovnom i do tri stambene jedinice od predračunske vrijednosti 1% ili

- minimalno 50,00 KM

- maksimalno 500,00 KM,

e) za objekte za kolektivno stanovanje, ostale stambeno-poslovne objekte, poslovne objekte i za ostale građevinske objekte, od predračunske vrijednosti 1% ili

- minimalno 100,00 KM

- Maksimalno 1000,00 KM.

Tarifni broj 15

Za izdavanje protokola regulacije ili građevinske linije:

a) za jednu ulicu10 KM,

b) za više ulica 30 KM.

Napomena:

1. Za obnovu regulacionog polja plaća se 70% od odgovarajuće takse iz ovog tarifnog broja.

Tarifni broj 16

Za izdavanje:

a) saglasnosti na prilog mjera zaštite na radu20 KM,

b) elektroenergetske saglasnosti na projekt elektroenergetskog inspektor20 KM,

c) sanitarne saglasnosti na lokaciju i projektnu dokumentaciju20 KM,

d) saglasnosti na projektovane mjere i normative zaštite od požara u tehničkoj dokumentaciji 20 KM.

Tarifni broj 17

- (1) Za tehnički pregled mašinskih, elektrotehničkih, elektromašinskih, plinskih i drugih postrojenja, koja po postojećim propisima podliježu obaveznom pregledu radi dobijanja odobrenja za upotrebu, plaća se po radnom satu komisije 40 KM.
- (2) Za pregled vozila u pogledu ispunjavanja tehničko-eksploatacionih uslova30 KM.
- (3) Za izradu fotodokumentacije o kriminalističko-tehničkom pregledu motornog ili priključnog vozila izvršenog u krugu policije 50 KM.
- (4) Za izradu fotodokumentacije o kriminalističko-tehničkom pregledu motornog ili priključnog vozila izvršenog van kruga Policije Brčko distrikta BiH70 KM.

Tarifni broj 18

Za izdavanje odobrenja za rad stranim državljanima100 KM.

Tarifni broj 19

Za izdavanje potvrde na elaborat o etažiranju, po svakom posebnom dijelu nekretnine 5,00 KM.

VII. PRIJELAZNE I ZAVRŠNE ODREDBE

Član 20

Danom stupanja na snagu ovog zakona prestaje da važi Odluka o usklađivanju administrativnih taksu na području Brčko distrikta («Službeni glasnik Brčko distrikta BiH», brojevi 9/00 i 11/01).

Član 21

Za akte i radnje u upravnim stvarima za koje je taksena obaveza nastala do dana stupanja na snagu ovog zakona, naplatit će se taksa koja je bila propisana u trenutku nastajanja taksene obaveze.

Član 22

Zakon o administrativnim taksama stupio je na snagu 3.8.2005. godine, a njegove izmjene i dopune 17.7.2007. godine, 20.2.2008. godine, 27.6.2009. godine, 15.5.2013. godine i 4.4.2020. godine (primjenjuju se od 1.1.2021. godine).